

四庫全書

史部

欽定四庫全書

史部

江西通志卷一百五十六

詳校官監察御史臣范衷

檢討臣德生覆勘

總校官知縣臣楊懋珩

校對官中書臣溫汝适

謄錄監生臣李逢堯

欽定四庫全書

江西通志卷一百五十六

藝文 詩十

五言小律

唐

送內尋廬山女道士李騰空二首 李白

君尋騰空子應到碧山家  
水舂雲母碓風埽石楠花  
若愛幽居好相邀弄紫霞

多君相門女學道愛神仙素手搗青靄羅衣曳紫煙一  
往屏風疊乘鸞著玉鞭

五言排律

唐

沈谿

王勃

弭櫂凌奔壑低鞭躡峻岐江濤出岸險峰磴入雲危溜  
急船文亂巖斜騎影移水煙籠翠渚山照落丹崖風生  
蘋浦葉露泣竹潭枝泛水雖云美勞歌誰復知

九江口南濟北接蘄春南潯陽岸 蘇味道

江路一悠哉滔滔九派來遠潭昏似霧前浦沸成雷鱗  
介多潛育漁商幾沂洄風搖蜀柅下日照楚萍開近漱  
湓城曲斜吹蠶澤隈錫龜猶入貢浮獸罷為災津吏揮  
橈疾郵童整傳催歸心詎可問為視落潮迴

登城樓望西山作

張九齡

城樓枕南浦日夕顧西山宛宛鸞鶴處高高煙霧間仙  
井今猶在洪崖久不還金編莫我授羽駕亦難攀簷際

千峰出雲中一鳥閒縱觀窮水國游思徧人寰勿復塵埃事歸來且閉關

下瀨石

孟浩然

瀨石三百里沿河千嶂間灘聲常活活洑勢亦潺潺跳沫魚龍沸垂藤猿狖攀榜人苦奔峭而我忘險艱放溜情彌愜登艫目自閑暝帆何處宿遙指落星灣

送鄭十二還廬山別業

劉長卿

潯陽數畝宅歸卧掩柴關谷口何人待門前秋草闌忘

機賣藥罷無語杖藜還舊筍成寒竹空齋向暮山水流  
經舍下雲去到人間桂樹花應發因行寄一攀

題干越亭

天南愁望絕亭上柳條新落日獨歸鳥孤舟何處人生  
涯投嶺徼世業陷邊塵江入千峰暮花連百越春秦臺  
憐白首楚水怨青蘋草色無征路鶯聲傍逐臣獨醒翻  
取笑直道不容身得罪風霜苦全生天地仁青山數行  
淚滄海一窮鱗流落誰相識空將鷗鳥親

天柱隱所重答韋江州

暢當

寂寞一悵望秋風山景清  
此中惟草色翻意見人行  
荒徑饒松子深蘿絕鳥聲  
陽崖全帶日寬嶂偶通耕  
拙味難容世貧寒別有情  
煩君瓊玖贈幽懶百無成

送杜郎中使君赴虔州

楊巨源

迢遰南康路清輝得使君  
虎符秋領俗鷄署早辭羣  
地遠仍連戍城嚴本帶軍  
傍江低檻月當嶺滿牕雲  
境勝閭閻闊天清水陸分  
和詩將惠政頌述九衢聞



晚登虔州即事寄李侍御

耿 漳

章溪與貢水何事會波瀾  
萬里歸人少孤舟行路難  
春光浮曲浪暮色隔連灘  
花發從南早江流向北寬  
故交參盛府新角聳危冠  
楚劍期終割隋珠惜未彈  
酒醒愁轉極別遠淚初乾  
願保喬松質青青過大寒

奉和第五相公登鄱陽郡城西樓

茂德為邦久豐貂舊相尊  
發生傳雨露均養助乾坤  
曉肆登樓目春銷戀闕魂  
女牆分吏事遠道啓津門  
溢浦

潮聲盡鍾陵暮色繁夕陽移夢土芳草接湘源封內羣  
忙復兵間百賦存童牛耕廢畝壕水遶新村野步漁聲  
溢荒祠鼓舞喧高齋成五字遠岫發孤猿一顧承英達  
多榮及子孫家貧仍受賜身老未酬恩屬和瑤華曲堪  
將繫組綸

題遺愛寺前溪松

白居易

偃亞長松樹侵臨小石溪靜將流水對高共遠峰齊翠  
蓋煙籠密花幢雪壓低與僧清影坐借鶴穩枝棲筆寫

形難似琴偷韻易迷暑天風撼撼晴夜露淒淒獨憇依  
為舍閒行遠作蹊棟梁君莫採留著伴幽棲

重到江州感舊遊題郡樓十一韻

掌綸知是忝剖竹信為榮才薄官仍重恩深責尚輕昔  
徵從典午今出自承明鳳詔休揮翰漁歌欲濯纓還乘  
小樓艤却到古湓城醉客臨江待禪僧出郭迎青山滿  
眼在白髮半頭生又校三年老何曾一事成重過蕭寺  
宿再上庾樓行雲水新秋思閭閻舊日情郡民猶認得

司馬詠詩聲

題別遺愛草堂兼呈李十使君

曾住爐峰下書堂對藥臺  
斬新蘿徑合依舊竹窻開  
砌水親開決池荷手自栽  
五年方暫至一宿又須回  
縱未長歸得猶勝不到來  
君家白鹿洞聞道亦生苔

送韓湘赴江西從事

姚合

年少登科客從軍詔命新  
行裝有兵器祖席盡詩人  
細雨湘城暮微風楚水春  
潯陽應足雁夢澤豈無塵  
猿叫

來山頂潮痕在樹身從容多暇日佳句寄須頻

送韓校書赴江西幕

朱慶餘

從軍五湖外終是稱詩人酒後愁特別塗中過却春山  
橋榭葉暗水館燕巢新驛舫迎應遠京書寄自頻野情  
隨到處公務日闕身久共趨名利龍鍾獨滯秦

奉送中丞姊夫儔自大理卿出鎮江西敘事書懷

因成十二韻

杜牧

惟帝憂南紀搜賢與大藩梅仙調步驟庾亮拂囊韉一

室何勞埽三章自不冤  
精明如定國孤峻似陳蕃  
灞岍秋猶嫩藍橋水始喧  
紅旖旎石壁黑稍斷雲根  
滕閣丹霄倚章江碧玉奔  
一聲仙妓唱千里暮江痕  
私好初童稚官榮見子孫  
流年休挂念萬事至無言  
玉輦君頻過馮唐將未論  
傭書疇萬債竹塢問樊村

夏日題遠公北閣

羅鄴

危閣歷山岡晴空疑鳥行  
勝搜花界盡響益梵音長  
有月堪先到無風亦自涼  
人煙紛繞繞諸樹共蒼蒼  
榻戀

高樓語甌憐春茗香此身閒未得驅馬入殘陽

和段校書冬夕寄題廬山

劉得仁

名高身未到此恨蓄多時是夕吟因話他年必去隨嘗  
聞廬嶽頂半入楚江湄幾處懸崖上千尋瀑布垂爐峰  
松淅瀝湓浦柳參差日色連湖白鐘聲拂浪遲煙梯  
緣薜荔嶽寺步敲危地本饒靈草林曾出祖師石樓霞  
耀壁猿樹鶴分枝細徑縈巖末高牕見海涯嵌空寒更  
極寂寞夜尤思陰谷冰埋木仙田雪覆芝亂泉禪客漱

異迹逸人知  
蘚室新開竈  
檉潭未了棋  
如何遂閒放  
長得任希尼

重歸宜春寄朝中知己

袁皓

水香甘似醴  
知是入袁溪  
黃竹成叢密  
青蘿夾岸低  
緩流瀾瀾戲  
深樹鷓鴣啼  
黃犬驚迎客  
青牛困卧泥  
有村皆績紡  
無地不耕犁  
鄉曲多耆舊  
逢迎盡杖藜  
殷勤傾白酒  
相勸有黃鷄  
歸老官知忝  
還鄉路不迷  
直言干忌諱  
權路恥依棲  
拙學趨時態  
閒思與牧齊  
稻糧饒燕雀



江海溢鳧鷖昔共逢  
離亂今來息鼓鞞  
恩仁霑品物教化及雕題  
上貢貞元祿曾叨寵記批  
何須歸紫禁便是到丹梯  
珍重長安道從今息馬嘶

南唐

秋霽望廬山瀑布

夏侯楚

常思瀑布幽晴眺喜逢秋  
一帶連青嶂千尋倒碧流  
濕雲應誤鶴翻浪定驚鷗  
星浦虹初下爐峰煙未收  
巖高時裏裹天淨起悠悠  
儻見朝宗日還須濟巨舟

廬山

李咸用

非嶽不言嶽此山通嶽言  
高人居亂世幾處滿前軒  
秀作神仙宅靈為風雨根  
餘陰鋪楚甸一柱表吳門  
靜得八公侶雄臨九子尊  
對猶青巘眼到必冷凝  
魂勢受重湖讓形難七澤  
吞黑巖藏晝電紫霧泛朝  
暎蓮墮寧唯華玉焚堪小  
崑倒松微發罅飛瀑遠成  
痕疊見雲容襯稜收雪氣  
昏裁詩曾困謝作賦偶無  
孫流礙星光撒驚衝雁陣  
翻峰竒寒倚劍泉曲旋如  
盆草短分雛雉林明

露擲猿秋楓紅葉散春石谷雷奔月好虎溪路煙深粟  
里源醉吟長易醒夢去亦銷煩有覺南方重無疑厚地  
掀輕揚聞舊俗端用鎮元元

題故李賓客廬山草堂

許彬

難窮林下趣坐使致君恩術業行當代封章動諫垣已  
明邪佞迹幾雪薜蘿冤報主深知此憂民詎可論名將  
山共古跡與道俱存為謝重來者何人更及門

廬山

李中

控壓潯陽景崔嵬古及今勢雄超地表翠盛接天心溢  
浦春煙列星灣晚景沈圖經宜細覽題詠卒難任靖節  
門遙對庾公樓俯臨參差舍積雪隱映見歸禽峭拔推  
雙劍清虛數二林白蓮池宛在翠輦事難尋天近星河  
冷龍歸洞穴深谷春攢錦繡石潤豐瓊琳元鶴傳仙拜  
青猿伴客吟泉通九江遠雲出幾州陰冬有靈湯溢夏  
無炎暑侵他年如遂隱五老是知音

寄題廬山二林寺

釋  
無可

廬嶽東南秀香花惠遠蹤名齊松嶺峻氣比沃州濃積  
岫連何處幽崖越幾重雙流溢隱隱九派棹憧憧山限  
東西寺林交旦暮鐘半天傾瀑溜數郡見鑪峰巖並金  
繩道潭分玉像容江徼匡俗路日杲晉朝松椽逕新苞  
拆梅籬故葉壅嵐光生疊砌霞燄發高墉牕籟虛聞狹  
庭煙黑過龍定僧仙嶠起逋客虎溪逢濩落垂楊戶荒  
涼種杏封塔留紅舍利池吐白芙蓉畫壁披雲見禪衣  
對鶴縫喧經泉滴漑沒履草丰茸翠竇欹攀乳苔橋側

杖筇探竒盈夢想  
披峭滌心胸冥奧終難盡  
登臨惜未從上方  
薇蕨滿歸去養垂慵

宋

南康落星寺

祖無擇

金碧共玲瓏  
樓臺浩渺中  
雨花僧講盛  
星石寺基雄  
巖岫廬峰對  
波瀾蠶澤通  
微紅看海日  
遠綠認江楓  
鷗鳥機心息  
潮音梵唱同  
人羣玉府  
寺有太宗皇帝御製御書  
物外廣寒宮  
雲袖蒸多壞  
塵襟到自空  
扁舟五湖客  
長此伴支

公

廬山瀑布

絕巘千尋勢飛泉萬疊痕寒光涵玉岫靈派析璇源峭  
壁河流立蒼崖井浪翻猿悲經樹急龍駭落潭渾氣爽  
諸峰秀聲和衆籟喧功成身退日期此灌中園

題仰山二十韻

維南斗牛下萬仞聳崔嵬日上光先占江盤勢卻迴一  
方蒙雨露幾處對樓臺不逐秦鞭去曾經禹載來雲生

峰慘淡冰泮谷喧阗險外煙嵐變深中洞府開巖花春  
灼爍溪鳥暖培塿飛瀑含清籟垂龍走疾雷平川蕭廟  
闕半腹鄧壇推精蘊瑤瑰寶竒鍾杞梓材僧軒宜薜荔  
樵徑怯莓苔旁睨龍洲橘前瞻庾嶺梅仙經饒地肺賦  
筆讓天台神物多靈眦農田少旱災隱居須獨行吟咏  
亦難才何客能依止伊予敢語哉一麾成繫滯四友阻  
遊陪未脫紅塵累徒嗟白髮催夢頻生枕席賞每倒尊  
罍預恐瓜時代圖歸作醉媒



鬱孤臺

蘇軾

入境見圖畫鬱孤如舊游山為翠浪湧水作玉虹流日  
麗崆峒曉風酣章貢秋丹青未變葉鱗甲欲生洲嵐氣  
昏城樹灘聲入市樓煙雲侵嶺路草木半炎州故國千  
峰外高臺十日留他年三宿處準擬繫歸舟

鬱孤臺

自注再過虔  
州和前韻

吾生如寄耳嶺外亦閒游贛石三百里寒江尺五流楚  
山微有霰越瘴久無秋望斷橫雲嶠竄飛蛇雪洲曉鐘

時出寺暮鼓各鳴樓歸路迷千嶂勞生閱百州不隨猿  
鶴化甘作賈胡留祇有貂裘在猶堪買釣舟

鄱陽湖四十韻

劉 翥

巨浸連吳越高躔直斗牛元冥開別府江伯匯支流象  
緯元精逼神姦秘怪裛番君疏帶礪彭蠡壯襟喉赴隙  
如無地憑孺忽有州津涯逾寫潤窟宅定劄幽島認瀛  
鼇戴濤疑陣馬蒐珠跳憐雨駛鏡滑識風收樹帶喬枝  
隱山餘短碧浮窺覘沒罔象睥睨怵陽侯漾月都迷皓

蒸雲間作油涵濡均藻荇冗長到鰕鰻蜃幻晴噓閣龍  
腥夜拔湫萬尋懸圃玉一帶洞庭秋盈縮知誰紀吞并  
似力拏鯉矜封赤鯀笑斥朱眸嵌竇扶桑齧珍文匠  
石鈹鷗羣馴野客玩肆傲潛虬罟數筐零霰檣輕弩激  
鏃孰分浮瓠滢或訝繞蛇丘絃索延商婦解艘送莫愁  
陶朱誠得策神禹想遺憂端稱潺湲弄非無隱伏搜豆  
分高下渚葦視去來舟血脈乾坤活瘡痍稼穡瘳狍猖  
包息壤瑣碎落浮漚蓮女嬋娟擢漁郎毛燥甌有人塞

繡被無客傲鷓裘  
貨貝窮乾沒醪羞  
肅丐求束枯論沃  
釜戒覆比傾斲  
衆木杯盃外  
佗年吐納尤鵲填  
功未議  
鯨吸志應酬  
何事輕思濟  
吾防果未周  
阡危心骨醉飄  
泊面顏羞  
敢計乘桴去何知  
戴笠遊片帆  
真擾擾  
隻影  
轉悠悠  
早濕嗟  
梁傳星霜挂  
魏牟勞歌慙  
孺子破簾付  
平頭烏豉緣  
尊置黃糧為  
鱸謀清螺取  
歸日穩  
擢聽夸

猶

妙覺寺

孫覲

老厭風波惡安閒且樂禪開簾延白日倚杖立蒼煙烏  
散人聲裏鐘殘客夢邊小蒲風葉偃薄槿露華鮮句好  
吟鬚斷懽餘落照偏人生但如此何處不翛然

游開先寺觀香爐瀑布諸峰讀李蘇二仙詩知廬

阜之勝在是記以十韻

王十朋

廬山何處好勝地有開先瀑布漱寒玉

漱玉亭

香爐生紫

煙紫霄長近日黃石不知年

黃石岩

鴈蕩靈湫合

有兩瀑布豐

城寶劍連龜行似朝斗

行龜峯

鶴唳欲沖天

鶴鳴峰

馬尾只

自洗

馬尾峰

牛頭奚用穿

牛頭巖

雄詞惟太白妙句更蘇仙

寺占星流處橋飛月出邊碑方閱華藏

山谷作開先華藏院記

夢

已到栖賢明日游三峽歸心定決然

元

桃源圖

并序

揭傒斯

江左龍虎山南十里有桃源者劉王二尊師所闢也

臨江范亨父為之記予為賦五言詩十七韻

桃源非一處龍虎畫難同內外關踰鐵高低石作叢黃

旛青劍北紫蓋白雲東  
蟾影當霄迴蛾眉抱月弓

六峰名

千重藏曲折四面削虛空地戶吟風黑天池浴日紅雪  
霜翻濺瀑雷雨瀉崩洪暗識猿啼遠晴聞鳥語工危龕  
三井祕絕澗九橋通江合仙崖怒山連鬼谷雄劉王開  
闢後秦晉有無中時見看桃侶頻逢采藥翁丹臺寒漠  
漠琳宇氣能能濟勝非無具緣源恐莫窮煙霞俄變滅  
草樹香籠蔥四序何勞誌羣愚倘擊蒙誰言武陵近十  
里上清宮

南山詩

山在龍虎山南張宗師藏劍鳥之地曰丹丘有小有洞門玉津澗月橋天鑑池金砂

井躍泉漱雲亭山雲

閣丹桂鵑桃花源云

陳旅

江左羣山園仙丘倚太霞上清分亢爽南谷抱谿訝臺  
觀黃瓊宅林巒赤虎家天池開寶鑑日井射金砂桂賈  
秋巖粟桃烘曉岸葩泉香通美竹雲液漱靈芽俯澗松  
偏潤緣崖逕自斜幽亭宜水繞晴閣受嵐遮神鳥丹扃  
祕元闕紫氣賒石橋留月色銀浦渺皇華願解延陵劍  
終乘博望槎臨風一邂逅食我棗如瓜



明

望香爐峰讀孟浩然詩因述

劉永之

移櫂望廬阜香爐舊識名鳥飛千嶂碧日淨片雲生瀑  
挂長虹下溪深猛虎行松門通佛宇蘿徑繞檐楹業愛  
遠公白詩欣孟子清余方謝羈束幸此共芳聲

擬峴臺

徐良傳

汝水抱城闈文昌帶石垠臺高平入漢山遠勢從閩雉  
堞分朝靄漁歌答霽旻晚沙明匹練煙樹暗通津款款

鳧鷖並垂橘袖親稍寬千里目翻愧百年身廊廟丹  
心在江湖白髮新頓能羣鹿豕亡論畫麒麟東景扶桑  
樹西流弱水濱仙鷲如可借去作遠遊人

惠孝寺

在西原山  
能仁寺西

陳嘉謨

西原西郭外寺景各宜人此地無行跡何緣駐病身風  
高絳殿冷天迴白雲新樹隔迴青嶂泉分轉綠蘋毒龍  
藏鉢小猛虎上街馴寤語初傳偈重來漫證因生涯悲  
大夢世界問微塵自怪陶潛僻長將慧遠親

過鉛山遊觀音山詩

葉向高

見說茲山好閒來愜勝遊懸崖藤欲合怪石筍能抽磴  
轉迴闌暮苔深古洞秋春圍羣嶂色綠湛小池流紺宇  
標香界慈雲繞沃洲氣從關尹望轄為故人投旅況尊  
中盡冥搜象外幽忽傳烽火急臨眺且消憂

匡廬道中

鄒元標

匡廬高萬丈道路何逶迤似挾風雷至回看星斗隨樓  
臺多美麗亭榭半傾欹五老標銀漢三江漾碧漪廊邊

鳴虎豹潭底浴蛟螭翠竹餘音響閒雲動遠思長吟秋色迴不覺午陰移小偈磨題徧巖僧未許知

望湖亭

胡大成

地盡三江外亭窺九派中水光深浴日山色遠依空極浦浮征棹長天度朔鴻劍如衝斗近星可泛槎通鬢髮隨年換登臨自古同朗吟湖上作漂泊憶蘇公

新淦陳黃石明府相過予問以土著之兵云為餉料疏裁去守城責之守令兵安可裁也

劉同升

淦水金湯固軍需安可裁逢迎出下策苟且誤將來守  
土寧無責旁觀莫浪猜豐亨全盛日經濟豈憂財漫謂  
窮搜括翻令基禍胎容兵非廟算土著扞城隈仗馬鳴  
將斥函牛鼎亦隕清時詎有闕言路固宜開日奏封疆  
警頻聞水旱災何緣桑孔計偏向省垣推廉吏紓三策  
憂邊備五材贈言兼遠畧清嘯得追陪

國朝

鬱孤臺弔古

曾燦

獨上鬱孤去登臨思渺然流鶯三月暮疎樹萬家煙浪  
打空城外山圍故國前女牆桑葉白官署杏花妍旅食  
朝彈劍春風夜控弦笳聲生古戍日影動長旃血戰元  
黃野人悲雞犬年賀蘭瞻獸闥鄆水奪龍輶下澤鳴芳  
雉行宮泣杜鵑樓高金鳳起關鎖玉虹懸鐘鼓埋榛久  
牛羊踐草眠講堂槽糞壑石碣枕荒阡玉馬聞河瑞銅  
人過渭川興亡雙眼落憂患一身全何處餘乾土誰人

有敗椽建牙廨養宅買伎水衡錢  
毛帳供三百駝羹費  
十千臺猶存望闕亭已著廉泉李趙勲  
何在周程緒獨  
傳高榕巢遠鵲平楚墮飛鳶  
暖氣侵衣重雲濤壓鬢偏  
估車通粵嶠灘路接湖天且讀賈生賦  
行休祖逖鞭升  
沈如白日去住只青氈囊刺投殘筆  
家留粥盡田吾生  
當此際何以策高騫

乙巳嘉平月同藥公及諸子遊青又庵

施閏章

晴冬風日好乘興恣攀躋嵐氣盈襟袖泉聲逐杖藜天  
圍一握小峰截片雲低暗穴熊留館荒陂虎印泥釣臺  
邀客坐石壁待誰題置屋緣茶圃分流潤麥畦野梅寒  
早發谷鳥臘先啼白飯烹葵美青林采藥迷惠莊心共  
遠支許手同攜不盡青青色重看萬嶺西

登滕王閣

朱彝尊

峻閣峙洪都凌虛落照孤縈迴窮島嶼波浪接荆吳舊  
地君王賞分封禮數殊霓旌千騎入玉佩幾行趨水汎



魚龍宅花濃蛺蝶圖星霜歌舞換俯仰物華徂蹟以三  
王重名將百代俱雄文思往事高興亦吾徒欄檻看如  
昨登臨信可娛西山開積雨南浦散平蕪作賦秦公子  
行吟楚大夫由來憑眺地襟帶有江湖

余作江州雜詩灌園既垂和續為潯陽行感慨淋  
漓讀之使我心惻因推本其意再成長律四十韻  
首言風土次序東晉以後迨明初一一竊據事終  
於寧南乙酉之禍此州被亂情形始末略備休養

生聚其在斯時乎並邀恒齋太守同賦

查慎行

鼓角悲涼地山川要害城一州當孔道萬里控江程近  
楚風猶悍吞吳氣未平鳧鷖飛易散魚鮪竄多驚戶少  
移恒業田磽廢力耕兒童知矢石婦女識旗旌不諒流  
離苦翻疑性命輕舊文徵史冊殘局愴棋枰置郡名

長易

秦為九江郡漢屬吳國三國初屬武昌後置潯陽郡晉改江州梁移九江治湓城唐宋為江州建炎

後陞定江軍元置江州路明為九江府

封王面或黥

謂英布

大都當用武未

有不稱兵建業朝廷小潯陽肘腋并中原方轉鬪南服

暫維寧草草圖王計寥寥伐叛聲奸雄雖反覆使相必

忠貞間倚屏藩重頻扶鼎鼐傾

晉永昌中陶侃領江州平王敦咸和中溫嶠義

兵由潯陽趨建業斬蘇峻隆安中劉毅何無忌輩敗桓元於潯嶺洲梁承聖中陳霸先以江州刺史定侯景之

亂艱虞經剝運成敗付閒評是物關天授伊誰敢力爭

每聞稱僭竊旋見就擒烹

宋泰始元徽中晉安王子勳桂陽王休範梁天監中刺史

陳伯之俱以江州反未幾就平南宋建炎中李成陷江州為張浚岳飛所敗元至正二十年陳友諒以江州為

都國號漢改元大義尋戰死昨者民何罪今來憤尚盈勤王須奉檄

犯闕爾無名灞上隨兒戲洄中笑客迎

崇禎甲申左良玉避流賊鋒欲

迨九江遊擊胡以寧鈞致之住闕廂一年已而返武昌乙酉春監軍御史黃澍偽藏太子詔召良玉入攻馬士

英良玉信之遂於三月二十七日移兵至九江將軍停鎧仗辨士絕冠纓勿戢

兵猶火搜牢地盡阮

初良玉發武昌挾楚督袁繼咸以往至是與繼咸標將郝二連營九

江城外四月初四日遂縱兵焚掠殺男女二十餘萬

摧殘鋒太酷屠戮禍交櫻漂

血長溝赤燒空烈焰晴押綱連萬艦

宋曹翰屠江州取廬山東林鐵羅漢

五百歸潁州調巨艦滿載金帛時號押綱羅漢

捲甲拔諸營作俑歸曹翰貪狼

甚李成天誅旋辜伏

兵發九江良玉以氣塞死舟中

殺氣驟難清落籍

銷灰劫招魂異死生若非敷大澤何以起疲氓牙齧枝  
初發勾尖草乍萌及時資愛養太守賴廉明冷暑依雙  
劍頽垣寄一楹涉園除瓦礫課僕種蕪菁耗拆空瓶粟  
支吾折脚鐺官貧仍逆旅吏隱亦柴荆曉雨排衙坐春  
田露冕行設施看次第氣象卜豐亨蟋蟀還農俗琵琶  
遣宦情篇成聊紀實大雅待君賡

康郎山功臣廟十四韻

疇昔驅除會英雄想像間驛移青雀舫酒灑白茅灣鷹

隼搏空擊鯨鯢授首還波濤經虎尾矢石避龍顏一戰  
西南定羣公策力閒死方開國運生不點朝班紀信無  
遺恨曹成本世官顯榮褒後裔茅土愴重頌奕葉將軍

樹

廟前古槐相傳明太祖  
破偽漢時封為將軍

中流砥柱山炎風焚鐵券石

馬嚼金環黃屋今無跡朱旗閃尚殷太平何事業要害  
此江關廟貌瞻嚴肅時情易險艱興亡他日事清泪獨  
潺潺

宿東林寺

江殷道

久愛煙霞好今尋薜荔香松濤踈入耳花雨暗侵裳  
檜老雲門古鐘閒蕭寺荒缺鐙餘宿火落葉護欹牀  
潭印禪心寂秋凝客思傷近峰連杳靄遠樹隔微茫  
蟲雜鳴泉咽風隨夕照涼高僧蓮欲白處士菊初黃  
酒社空村墅經聲卧法堂獨留橋上月回憶草頭霜

六言排律

宋

遊麻姑山

朱彥

羽駕龍車舊宅金爐玉簡幽宮雙練亭前秋水七星杉  
下春風蓮沼何年變白桃源幾度翻紅明月清陰居士  
星冠羽褐髯翁一弄瑤池新曲夜寒風入霜松

七言排律

宋

陳義門

錢若水

居近東崖對白雲義風深可勸人倫兒童盡得詩書力  
門巷偏多車馬塵樓上落霞黏筆硯池邊怪石間松筠



鄉閭豈獨民遷善堦砌兼聞犬亦馴朱實垂庭紅橘熟  
清香襲座藥畦春他年好卜為隣住悔葺吾廬洛水濱

送知軍曹比部移虔州

李覲

要知賢者善居官法自嚴明性自寬黠吏欲欺難作計  
愚民初懼久方安獄詞大小情皆見市物公私價一般  
農力不聞供土木窮閭猶得免饑寒星為二使來巡撫  
考未三年悉可觀劇郡便當煩鎮守君恩寧許更盤桓  
兩轡贛水行非遠五袴盱江日漸單從此天衢龍躍去

野人懷德謾悲酸

五言絕句

唐

送胡真師還西山

見真仙通鑑

唐明皇

仙客厭人間孤雲比性閒  
話離情未已煙水萬重山

別東林寺僧

李白

東林送客處月出白猿啼  
笑別廬山遠何煩過虎溪

江行雜詩六首

錢起

新野舊樓名潯陽勝賞情照人長一色江月共淒清  
願飲西江水那吟北渚愁莫教留滯跡遠比蔡昭侯  
湖口分江水東流獨有情當時好風物誰伴謝宣城  
潯陽江畔菊應似古來秋為問幽棲客吟時得酒不  
咫尺愁風雨匡廬不可登祇疑雲霧窟猶有六朝僧  
幽懷念煙水長恨隔龍沙今日滕王閣分明見落霞

過白鶴觀尋岑秀才不遇

劉長卿

不知方外客何事鎖空房應向桃源裏教他喚阮郎

送靈徹上人

蒼蒼竹林寺杳杳鐘聲晚  
荷笠帶夕陽青山獨歸遠

同賦龍沙墅

戴叔倫

回轉沙岸近欹斜  
林嶺重因君訪遺跡  
此日見真龍

憶鄱陽舊遊

顧況

悠悠南國思夜向江南泊  
楚客斷腸時月明楓子落

登匡頂

遙聞林下語知是經行所  
日暮香風時諸天散花雨

過彭澤

孟郊

揚帆過彭澤舟人訝歎息不見種柳人霜風空寂歷

遺愛寺

白居易

弄日臨溪坐尋花遶寺行時時聞鳥語處處是泉聲

庾樓

重遊蕭寺宿再上庾樓行邠人猶認得司馬詠歌聲

宿吉祥寺寄廬山隱者

楊衡

風鳴雲外鐘鶴宿千年松相思杳不見月出山重重

信州水亭

張祐

南簷架短廊沙路白茫茫盡日不歸處一庭梔子香

題彭澤盧明府新樓

碧落新樓迴清池古樹閒先賢盡為宰空看縣南山

香爐峰

徐凝

香爐一峰絕頂在寺門前盡是玲瓏石時生旦暮煙

廬山獨夜

寒空五老雪斜月九江雲鐘聲知何處蒼蒼樹裏聞

夜泊九江

崔道融

夜泊江門外，歡聲月裏樓。  
明朝歸去路，猶隔洞庭秋。

陪江州李使君重陽宴百花亭

朱慶餘

閒攜九日酒，共到百花亭。  
醉裏求詩境，回看島嶼青。

弋陽訪古

施肩吾

行逢葛溪水，不見葛仙人。  
空拋青竹杖，呪作葛陂神。

經吳真君舊宅

古仙煉丹處，不測何歲年。  
至今空宅暮時，有五色煙。

臨川送別

牛鳳及

秋郊日半隱野樹煙初映風水正蕭條那堪動離詠

題竹林寺

朱放

歲月人間促煙霞此地多殷勤竹林寺更得幾回過

遠公墓

釋  
靈徹

古墓石稜稜寒雲晚景凝空悲虎溪月不見雁門僧

送僧遊香山寺

釋  
齊已

君到香山寺探幽莫損神且尋風雅主細看樂天真



宋

南浦

王安石

南浦隨花去迴舟路已迷暗香無覓處日落畫船西

初入廬山三首

蘇軾

青山若無素偃蹇不相親要識廬山面他年是故人  
自昔懷清賞神遊杳靄間如今不是夢真箇到廬山  
芒屨青竹杖自挂百錢遊可怪深山裏人人識故侯

廬山五詠

上界足官府飛仙亦何益還在此山中相逢不相識

盧敷

洞

博士雅好飲空山誰與娛莫向驪山去君王不喜儒

飲酒

臺

石室有金丹山神不知秘何必露光芒夜半驚童稚

聖燈

巖

皎皎巖下泉無人還自潔不用比三星清光同一月

三泉

長安不自遠蜀客苦思歸莫教名障日喚作小峨眉

障日

峰

白鶴觀

孔武仲

洞天人遠矣琳館有遺踪願棄人間事優遊慕赤松

化成院二首

化成真化出絕險起朱欄直下臨無處江城一掬看  
登覽多清興衣襟有白雲松風不知際山籟坐中聞

曹亭二絕句

孔平仲

外看江水長裏見荷花發廬阜收白雲南浦浸明月

漾舟荷花裏，棹綠楊陰。却上曹亭望，山高江水深。

南昌繡谷山幽谷亭

曾肇

行盡車馬塵，坐見水石環。誰料千家縣，正在清華間。

徐亭汎舟二首

彭汝礪

萬葉雲煙上，千花錦繡中。停車不忍發，為恐破圓紅。  
晚雨軒窗潤，秋風池沼香。愛花不忍折，恰似惜甘棠。

隆興道中

晁沖之

澗道垂黃花，山城擁紅葉。人爭小舟渡，馬就平沙涉。

廬山詩

洪朋

山瀑兩道瀉木葉四時春日暝不知去魚鳥會留人

自祁門至進賢路中懷舊二絕

呂本中

雨歇路逾滑山空鳥不飛却思無事日騎馬踏泥歸  
汴水夾榆柳今留代馬蹤如何進賢路只是見青松

州宅十二詠

王十朋

愷悌周君子循良漢守臣如今坐堂上端是政平人

政平

堂

不是因三秀名堂意自深要居森戟地毋忘采芝心

玉芝

堂

昔日栽花者官移花未開舊花今豈在猶說范公栽

慶朔

堂

會得名軒意公餘坐片時退思何及矣未退早須思

退思

軒

猶起才難歎同時九亂臣鄙陽千載守賢豈許多人

九賢

堂

有澤宜觀水無簷不見山番君千里國俯仰一亭間

四望

亭

誰品鄱陽守四人賢不知如何堯舜世能使野無遺

四賢

堂

孤鷺同飛處澄江共賦詩晚來亭上看真是謝公詩

綺霞

亭

高架添風韻芳醪共姓名蘇州凝燕寢疑是此香清

清香

亭

昔日風流守公餘種百花春風不檢點紅紫落誰家

百花

樓

郭外山橫閣江邊水照樓麤官無暇日何以得消憂

江都

樓

亭廢名猶在春來花自芳猶餘蜀中錦愛惜比甘棠

蜀錦

亭

### 題天華院

遊徧廬山寺茲山亦自佳數宵緣石耳一飯為天華



馬當山

此地水如峽有山名馬當猶疑是灩澦更合戒舟航

白公草堂

廬阜雙林寺爐峰幾辦香日烘煙裊紫敬為白公堂

萍鄉

劉克莊

聞說萍鄉縣家家有絹機荒年絲價貴未敢議寒衣

墨莊五詠

朱子

詩書啓山林德義久儲積嗣世知有人新畬更開闢

墨莊

窗開深井泉窈窕千丈碧何幸且淵澄無勞遽心惻

列軒

幽人本何心偶此翳環堵隱几亦無言光風遍寰宇

靜春

堂

竹几橫陳處韋編半掩時寥寥三古意此地有深期

玩易

齋

倚杖臨寒水披襟立晚風相逢數君子為我說濂翁

君子

亭

列岫亭望西山最正殆無毫髮遺恨滕王秋屏皆

不及也因作詩二首

城中望西山拄頰空朝暮不到列岫亭詎知親切處  
東西水平分南北山中判妙處毫髮間商略無遺算

湛泉送客二絕句

徐鹿卿

吾生如寄耳嶺陟又三年正是歸心碎那堪送客船  
中年懷易惡更聽斷腸聲多謝兩榕樹逢人管送迎

元

五面山

趙孟頫

洞中卽仙境洞口是桃源何殊五陵路雞犬自成村

長廊巖

修巖如長廊下有流泉注山中古仙人步月自來去

太平山雜詠

二十二首

揭篋斯

太平最高峰暑亭更瀟灑但有日與月晝夜繞簷下

極高

明亭

雲歸樹繞環雨餘山更淨長嘯天地低引手捫斗柄

北極

山

井水深莫測，甘冽如沆瀣。一朝蟄龍起，霖雨滴下界。

井龍

洛水載書出，化為碧孱顏。堂堂富川郡，永鎮東南山。

山龜

仙人出未還，老鶴惜無伴。延頸東臯山，不知日已晚。

山鶴

枯槎大幾何，泛泛此溪渚。會乘天上去，殷勤問牛女。

枯槎

溪

天風西北至，獵獵動雲旗。却訝西王母，瑤池晝下時。

雲旗

峰

空巖發靈籟，彷彿如風雷。只宜函寶劍，天遣六丁開。

雷巖

坡上春雲白坡前瑤草長仙人三十指曾此采幽香

三仙

坡

少年武當至寄此南枝春歲歲滿樹上花開遲故人

梅柳

異根却連枝欣欣更榮發詠出山中人此義良可法

義標

山靈驅猛獸跑出一泓泉流作人間去還為大有年

鹿跑

泉

煙雲常黯澹時護五雷峰忽爾雲烟散撐空翠萬重

五雷

峰

石門高幾何自非神禹鑿有時龍忽歸滿山風雨作  
何年孟氏姥照影石潭底姥去不可追至今名在耳

孟姥

龍門

潭

愛此獅子巖宛若獅子踞忽然一咆哮清音滿天地

獅子

巖

梧桐葉初凋高岡秋瑟瑟鳳凰飛去來月明如白日

梧桐

崗

睽此石葫蘆不隨草木壞誰能剗其中納此大千界

葫蘆

石

茅君騎虎來石上遺虎跡豈無莓與苔自是不敢藉

虎跡

石

白石亦何堅文豹來齒之齒之痕尚在無乃神所為

豹齒

石

陰洞有靈藥不知經幾春年來荷鑪冶化作石丈人

石人

洞

仙人亦雙腳踏石如踏泥泥痕尚可沒石痕不可迷

仙跡



石

建昌小湖望廬阜二首

范梈

青雲覆疊巘白鳥度平湖  
釣嶼夜來雨山深知有無  
我懷真鍊士多在巖谷陰  
惟有高林月長知望遠心

信州招真觀五首

袁桷

縱橫太古石短長千歲藤  
感彼巖居子獨飲古澗冰  
鬼

巖

曉汲寒泉清明月各在岳岳空  
不見月引水復在手寒月

泉

截玉作明簾不知簾外事應有碧眼仙隔簾見人至  
玉簾

泉

顧兔樂嬉遨入地不得騁化為白玉泉彷徨返東井  
月巖

金鼎悶寒泉真火彌不壞年深定飛騰子夜吐光怪  
丹井

龍虎山四詠

巨靈劈山石飛出黃金雞至今山下人猶聽雲中啼  
金雞

山

載寶出西域獻琛自南溟仙人一叱之化作青陵山象

寶劍落深潭時時見光怪鱗甲飛上天白晝風雨快井龍

天星二十八下作漢廷將功成歸帝傍精彩射石上臺雲

山

題分宜縣橋

郭鈺

雲從溪北生雨過溪南響溪上蓑笠翁倚闌看水長

龜峰絕頂

釋大圭

危石青入雲上有千歲木我來卧其間天風響巖谷

明

陶皮石室

自注卽今北巖古陶皮二仙修煉之所天將雨則巖竇有泉出焉禱者常以爲

候舊名觀音

巖今正之

劉崧

北巖極豁豁三面環絕壁聞有山雨來石泉先暗滴

百花洲

鳴榔百花洲繫船楊柳樹乳鴨湖上歸浮沉不知數

遊仙巖二首

偶喜尋幽境閒逢採藥翁丹丘知不遠只在碧溪東

石髓雲中現蓮花水上浮神仙如可待直到最高頭

書草萍驛

王寬

三月草萍驛風花點客衣春山啼杜宇也道不如歸

彭浪磯

夏寅

虎牙彭浪石鐵柱小孤山江漢朝宗道東南第一關

楊林橋

在貴溪

吳與弼

野水平橋路行行霽景開地名時記取他日或重來

宿長林

歇轎來磐石支頤面好峰道旁秋水淨嶺背夕陽紅

四仙亭野望

何遷

野逕披寒雪空山傍夕昏萬峰藏日觀一水上天門

吉安

李東陽

山勢西來斷江流北去平萬家深樹裏聞是吉州城

墨莊五詠為天寶劉氏賦

有序

楊廉

按劉氏之居清江靜春與集賢舍人各自為派而同出於墨莊以上評事璵也墨莊初於汴宋而記於南

渡之後今天寶士會又為之起廢於異代遷徙之後  
且并晦翁所為五詠曰軒堂齋亭者舉復其舊觀其  
志亦已勤矣雖然昔之名亭勝宇類不在天地間所  
以不朽者人也士會之令器今南京刑部檢校高邀  
余賦之因識於此若夫所謂不朽者在檢校君豈可  
不以前聞人自勛哉

前人墨為莊原不在青紫我愛考亭翁發明良有以墨莊  
為學如掘井成功斯及泉猶聞軒中人麗澤師友賢軒例

誰謂靜為主誰供春一月周程去未遠淵源豈容絕

靜春

堂

寡過聖絕編踐履賢盡易神明本在人豈必泥龜策

玩易

齋

水華晚尤佳對之詎忍折人間遊戲文千古愛蓮說

君子

亭

周村八景為松亭題

夏尚朴

節彼雞鳴峰下有先賢宅孳孳為善心俯仰無今昔

雞鳴



峰其下有宋狀  
元徐梅野故宅

青山誰結廬偏近猿猴穴時聞王子喬吹笙弄明月

嘯猿

岫

明月到清池寒光漾如許羊裘時獨披愛與魚鰕侶

釣月

池

朝來一雨餘白雲滿平野中有植杖翁不見問津者

耕雲

坂

君如王右丞亦愛松間屋月下時獨來清風響幽谷

愛松

亭

路入山自幽，獨趁幽尋去。時聞伐木聲，遠在雲深處。

樵採

徑

春江湧釣沙，便有鷗來宿。相對總忘機，滿江煙水綠。

鷗來

渚

杖策時出遊，歸途雜樵牧。夕陽猶半山，啼鳥在深竹。

歸鳥

林

表節婦三首

吾邑表尹達祖  
母迎養在任

夏言

阿母冰霜節空閨六十春  
袁宗今有後不負未亡人  
始鞠無父孤終憐無母孫  
一生為袁氏辛苦難具論  
阿母壽幾何於今八十餘  
向時滕上孫之官奉母俱

卧雪東林寺延望天池感賦二首 胡直

宿世天池客雲深世絕尋  
東舍匡仙館西家董奉林  
一落何遲迴飈輪久莫馭  
悵望山頭雲徘徊山下路

黃牛潭

饒烈

入口話黃牛紛紛上急流  
人聲喧鬧處燈火競維舟

九日遊三疊泉 二首

魏良器

醉卧藤蘿石溪花映客衣不知山日暮猶問此何時

三疊我重遊匡廬九月九菊花笑淵明底用王宏酒

盤龍東嶂

魏良政

東望盤龍峰見山不見龍龍盤不可見上有雲萬重

鶴嶺西屏

靈峰插天表鶴嶺在其西靄靄翠雲屏可望不可移

晚下廬山

徐正卿

下山鼯鼠啼藤竹使人迷多謝東林月殷勤過虎溪

馬當大風投詩乃止

劉鐸

倒峽羣龍鬪騰空萬馬嘶江神遣巨浪索我笈中詩

聚僊亭

徐良傳

四僊如聚塵中有徐道人偶爾過前識安知非後身

水口寺

今日白頭僧先朝清宮使朝拂廬山雲暮宿水西寺

廬山五老峰

郭正域

湖中五老峰去天不盈尺澗底白雲生五老頭俱白

落星石

陳翼飛

白榆何夕墮危石青如此疑是酒星沈渴飲湖中水

芝山春遊

祝世祿

溪山春正半載酒烏邊亭取醉非吾事乾坤忌獨醒

自信州還貴溪

朱大啓

小艇恰容膝輕帆下溜灘忽聞津吏語斜月挂江干

擲筆峰

李萬寶

遠公說金經書罷曾擲筆千年棄不收化作一峰立

捨身崖

峭壁一萬丈飛鳥愁欲下望雲思我親此身未能捨

水壺泉

一泓沁寒泉冰壺浸秋月我來湖上窺照影數毛髮

虎溪

送客過溪橋虎嘯溪上石溪水至今流月黑烟蘿碧

從姑山一線天

趙伯里

石罅劃天開山光割昏曉振衣凌絕頂自覺衆峰小

白雲亭

在彭澤亭為  
秋梁公作

陳嘉謨

一老獨望雲五龍竟取日公於君親際侗儻故無匹  
白雲望不極重上白雲亭亭下九江水茫茫鷗鷺汀

登雪浪閣瞻念菴先生祠

張位

閣外浪如雪座中人似仙高風不可覩山水尚依然

白鹿洞月下口占

二首

李應昇

渡溪芒屨溼兀立酒初醒點點松梢白踈痕幾箇星



言尋獨對亭相將松影去獨對者誰子問松松不語

仙人石

揭重熙

仙人何處去空有仙人跡時一聞笙簫元雲來絕壁

市汊驛下阻風

程誥

江干日色黃北風怒不已君看上水船一日三百里

琵琶亭

殘照亭臯夕秋風旅鴈飛琵琶千載恨淚滿逐臣衣

國朝

清江月色

歐陽斗照

江水澄太虛寒蟾印秋影不待楓落時已似吳江冷

江行

施閨章

將入雙江路雲迷阜口西昨宵愁不寐恰有鷓鴣啼

懷讓邗客虔州

聞君發歸棹還滯虔城裏雙江人不來愁殺雙江水

入廬山口號

二首

王貽上

翠竹青松裏橫峰側嶺間坡公曾有語真箇到廬山

曉出潯陽郭廬山方出雲雲中雙白虎邀我問匡君

車盤驛題逆旅主人壁

朱彝尊

曲澗層層響叢篁个个齊前山行更好不信鷓鴣啼

晚過東山寺

飛閣流丹蝕層巒積翠多松間明月在惆悵山下歌

五老峰上絕境詩

朱徽

踏倒兜羅絲四望琉璃界不知天地間何者有成壞

曉發小密至瑞金縣作

二首

丁煒

樹響欲驚秋嵐深欲變雨雲山翠幾空莫辨來時路  
望裏見孤城行行津市杳極浦水霞收遙天山月小

同梅月川翰林泛舟過北蘭寺

熊一瀟

城闌三面浮須臾失高閣杳杳望香林磬聲煙際落

廣信舟中望靈山

查慎行

頑石四百里

自安仁至鉛山河口臨江  
石山狀如覆盎草木不生

茲馬秀獨鍾翠

屏三十六不數九芙蓉

鹿洞雪

二首

千建邦

此龍翔碧漢鱗甲故垂垂始信洞門裏今朝是葛陂  
敗絮迎扉坐猶如退院僧呼童呼木屑為接遠來朋

楊柳洋詞

次家鴻博載韻  
二首

錢陳羣

美人入空際解佩遺蒼瑤化作一溪水楊柳垂長條  
青溪折楊柳露下沾衣裳相送不相語洞口逢漁郎

六言絕句

唐

寄李袁州桑落酒

郎士元

色比瓊漿猶嬾香同甘露仍春十千提攜一斗遠送瀟湘故人

元

送鄧師禹歸龍虎山

袁 楠

小帽飛花一寸輕舟流水三分落日獨歸口隔溪短  
笛猶聞

鰲溪山行和彭琦初二首

劉 詵

照袂晴江淺淺迎風青鬢疏疏看山拄杖欲倦得句畫

沙共書

巖上石仙流雨灘頭春壑生雷回首鹿門總角鬢顏如  
戟重来

題危太樸雲林圖

丁復

天台萬八千丈雲林三十六峰幾載山中獨憶今朝江  
上相逢

明

弋陽道中

陸瑯

石子船頭磊磊溪聲枕上潺潺人行上瀨下瀨夢隔千山萬山

國朝

瀘溪口號四首

苗蕃

過嶺復過一嶺渡溪又渡雙溪澗底敲金戛玉林中吠  
犬鳴雞

溪口雪橋銀粟山腰兜竹斑斕糾葛江南亦冷輕裘塞  
北寧寒



虎豹深山似北鳧  
鷺泛水知冬信  
斧誰揮竹紙飛  
輪自擣溪舂

昨宿溪斜晚翠  
今來旭捲朝霞  
半霧半晴山麓  
如圖如畫人家

芙蓉峰


巖開禧

莫道琳宮寂寞  
四面山映疎窗  
九朶芙蓉秀出  
疑眸日  
日秋江

清流峰

闕名

夙仰名藍勝跡飛泉拖練縈紆疑是銀河倒落蒼茫奇  
並匡廬



江西通志卷一百五十六

欽定四庫全書

史部

江西通志卷一百五十七

詳校官監察御史臣范衷

檢討臣德生覆勘

總校官知縣臣楊懋珩

校對官中書臣溫汝适

謄錄監生臣李逢堯

欽定四庫全書

江西通志卷一百五十七

藝文

詩十一

七言絕句

唐

與黃檗禪師觀瀑布聯句

唐宣宗

千巖萬壑不辭勞  
遠看方知出處高

黃檗

溪澗豈能留得

住終歸大海作波濤

宣宗

望廬山瀑布水

李白

日照香爐生紫煙遙看瀑布挂前川  
飛流直下三千尺疑是銀河落九天

登廬山五老峰

廬山東南五老峰青天削出金芙蓉  
九江秀色可攬結吾將此地巢雲松

寄廬山櫟衣居士

韋應物

兀兀山行無處歸山中猛虎識櫟衣  
俗客欲尋應不遇

雲溪道士見猶稀

尋簡寂觀瀑布

躡石欹危過急澗  
攀崖迢遞弄懸泉  
猶將虎竹為身累  
欲付歸人絕世緣

送前上饒嚴明府攝玉山

戴叔倫

家在故林吳楚間  
冰為溪水玉為山  
更將舊政化鄰邑  
遙見逋人相逐還

臘日龍沙會絕句

權德輿

簾外寒江千里色林中罇酒七人期寧知臘日龍沙會  
却勝重陽落帽時

餘干贈別張二十三侍御

蕪城陌上春風別干越亭邊歲暮逢驅車又愴南北路  
返照寒江千萬峰

徐孺亭馬上口號

并序

鍾陵東湖之南有亭亭中有二碑一則故曲江張公  
所製徐徵君碣一則北海李公所製放生池碑嗟夫

二君子久隨化往而二文之盛傳於天下貞元初余  
為是邦從事每將迎郊勞多經是間且以其尚賢好  
生皆醇仁之首也因歎不得與二賢同時論文變損  
益亭址圯壞苔篆磷趺古風如在感舊依然而通馘  
在側平湖在下波流駁擊日月無窮因於馬上口號  
絕句一首以寄愀愴

湖上荒亭臨水開  
龜文篆字積莓苔  
曲江北海今何處  
盡逐東流去不迴



黃檗館

驅車振楫越山川  
候曉通宵冒煙雨  
青楓浦上魂已銷  
黃檗館前心自苦

望簡寂觀

顧況

青嶂青溪直復斜  
白雞白犬到人家  
仙人住在最高處  
向晚春泉流白花

安仁港口望仙人城

樓臺采翠遠分明  
聞說仙家在此城  
欲上仙城無路上

水邊花裏有人聲

小孤山

古廟楓林江水邊  
寒鴉接飯雁橫天  
大孤山遠小孤出  
月照洞庭歸客船

思歸寄東林澈上人

并序

韋丹

澈公近以匡廬七詠見寄及吟諷之皆麗絕於文圃也此七詠者俾予益發歸與之興且芳時勝侶卜遊於三二道人必當攀躋千仞之峰觀九江之派是時

也飄然而去不希京口之顧默然而遊不假東門之  
送天地為一朝萬物任陶鑄夫二林翼翼松逕幽邃  
則何必措足於丹霄馳心於太古矣偶為思歸絕句  
詩一首以寄上人法友幸先達其深趣矣

王事紛紛無暇日浮生冉冉只如雲已為平子歸休計  
五老巖前必共聞

題五老峰下費君書院

楊巨源

解向花間栽碧松門前不負老人峰已將心事隨身隱

認得溪雲第幾重

遊西林寺題蕭二兄郎中舊堂

韓愈

中郎有女能傳業  
伯道無兒可保家  
偶到匡山曾住處  
幾行衰淚落煙霞

楚昭王廟詩

丘墳滿目衣冠盡  
城闕連雲草樹黃  
猶有國人懷舊德  
一間茅屋祀昭王

酬樂天舟泊夜讀微之詩

元稹

知君暗泊西江岸  
讀我閒詩欲到明  
今夜通州還不睡  
滿山風雨杜鵑聲

琵琶亭

夜泊尋陽宿酒樓  
琵琶亭畔荻花秋  
雲沈鳥沒事已往  
月白風清江自流

題李八百洞

符載

太極之言混沌圻  
此山亦是神仙宅  
後世何人來飛昇  
紫陽真人李八百

大林寺桃花

白居易

人間四月芳菲盡，山寺桃花始盛開。  
長恨春歸無覓處，不知轉入此中來。

建昌江

建昌江水縣門前立馬，教人喚渡船。  
忽似往年歸蔡渡，草風沙雨渭河邊。

宿西林寺

木落天晴山翠開，愛山騎馬入山來。  
心知不及柴桑令，

一宿西林便欲回

題廬山山下湯泉

一眼湯泉流向東  
浸泥澆草煖無功  
驪山溫水因何事  
流入金鋪玉甃中

望江州

江迴望見雙華表  
知是潯陽西郭門  
猶去孤舟三四里  
水煙沙雨欲黃昏

題崔使君新樓

憂人何處可銷憂  
碧甃紅欄溢水頭  
從此潯陽風月夜  
崔公樓替庾公樓

鍾陵餞送

翠幙紅筵高在雲  
歌中一曲萬家聞  
路人指點滕王閣  
看送忠州白使君

遊西山蘭若

羊士諤

路傍垂柳古今情  
春草春泉咽又生  
借問山僧好光景  
看花攜酒幾人行



重登滕王閣

李涉

滕王閣上唱伊州二十年前向北遊  
半是半非君莫問  
好山長在水長流

遊西林寺

十地初心在此身  
水能生月即離塵  
如今再結林中社  
可羨當年會裏人

廬山瀑布

徐凝

虛空落泉千仞直  
雷奔入江不暫息  
今古長如白練飛

一條界破青山色

再歸松溪舊居宿西林

五粒松深溪水清  
衆山搖落月偏明  
西林靜夜重來宿  
暗記人家犬吠聲

過馬當

風波隱隱石蒼蒼  
送客靈鴉拂去檣  
三月盡頭雲葉秀  
小姑新著好衣裳

宿青牛谷梁鍊師仙居

楊衡

隨雲步入青牛谷青牛道士留我宿可憐夜入明月中  
惟有壇邊一枝竹

送舍弟孺復往廬山

熊孺登

能騎竹馬辨西東未省煙花暫不同第一早歸春欲盡  
廬山好看過湖風

望麻姑山

鮑溶

幽人往往懷麻姑浮世悠悠仙景殊自從青鳥不堪使  
更得蓬萊消息無

贈鄭徵君家匡山首春與丞相贊皇公遊止

溫庭筠

一拋蘭櫂逐燕鴻曾向江湖識謝公  
每到朱門還悵望  
故山多在畫屏中

鷺湖山

張蠟

鷺湖山下稻梁肥豚柵雞栖對掩扉  
桑柘影斜春社散  
家家扶得醉人歸

題弋陽館

張祐

一葉飄然下弋陽  
殘霞昏日樹蒼蒼  
吳溪謾淬干將劍  
却是猿聲斷客腸

西江晚泊

趙嘏

芒芒靄靄失西東  
柳浦桑村處處同  
戍鼓一聲帆影盡  
水禽飛起夕陽中

紫極宮齋夜

李羣玉

紫府笙歌碧落寒  
晚星寥亮月光殘  
一羣白鶴高飛散  
惟有松風掃石壇

題玉筍山強處士

方干

酒裏藏身品裏居  
刪繁自是一家書  
世人呼爾為漁叟  
爾學釣璜非釣魚

題廬山雙劍峰

來鵠

倚天雙劍古今閒  
三尺高於四面山  
若使火雲燒得動  
始應農器滿人間

訪潯陽友人不遇

韋莊

不見安期海上樓  
寂寥人對鷺鷥愁  
蘆花雨急江煙暝

何處潺潺獨棹舟

撫州江口雨中作

江上間衝細雨行  
滿衣風洒綠荷聲  
金駟掉尾橫鞭望  
猶指廬陵半日程

西山靜中吟

施肩吾

重重道氣結成神  
玉闕金堂逐日新  
若數西山得道者  
連余便是十三人

宿干越亭

琵琶洲上人行絕，干越亭中客思多。  
月滿秋江山冷落，不知誰問夜如何。

依韻贈南安方處士

二首

徐寅

兩鬢當春却似秋，僻居誇近野僧樓。  
落花明月皆臨水，明月不流花自流。

晉楚忙忙起戰塵，龔黃門外有高人。  
一畦雲薤三株竹，席上先生未是貧。

南昌道中

陳陶



古道黃緣蔓黃葛桓伊冢西春水濶村翁莫倚橫浦罾  
一半魚鰕屬鶻獺

鍾陵秋夜

洪崖嶺上秋月明野客枕底章江清蓬壺宮闕不可夢  
一一入樓歸鴈聲

題徐穉湖亭

伏龍山橫洲渚地人如白蘋自生死洪崖成道二千年  
唯有徐君播青史

上蘇使君

伍唐珪

江西昔日推韓注表水今朝數趙祥縱使文翁能待客  
終栽桃李不成行

題袁州龍興寺

易思

百尺古松松下寺寶幡朱蓋畫珊珊閒庭甘露幾回落  
青石綠苔猶未乾

大庾驛有懷

蔣吉

一囊書重百餘金郵吏寧知生計貧莫訝偏吟望鄉句

明朝便見嶺南人

憶潯陽舊居兼感長孫郎中

周賀

潯陽却到是何日此地今無舊使君  
長憶窮冬宿廬嶽瀑泉冰圻共僧聞

南唐

湖口縣

王周

柴桑分邑載圖經  
屈曲山光展畫屏  
最是蘆洲東北望  
人家殘照隔煙汀

題梅仙館

孟賓于

仙界路遙雲縹緲古壇風冷葉蕭騷後來豈合言淹滯  
一尉昇騰道最高

彭澤解印

廖凝

五斗徒勞謾折腰三年兩鬢為誰焦今朝官滿重歸去  
還挈來時舊酒瓢

訪廬山歸章禪伯

李中

沈沈石室踈鐘後寂寂沙池片月明多少學徒求妙法

要於言下悟無生

廬山棲隱洞譚先生院留題

壇畔歸雲冷濕襟  
拂苔移石坐花陰  
偶然醒得莊周夢  
始覺元門興味深

閣阜山

徐鉉

殿影高低雲掩映  
松陰繚繞步徘徊  
從今莫厭簪裾累  
不是乘軺不得來

簡寂觀

釋

靈徹

古松古栢巖壁間  
猿攀鶴巢古枝折  
五月有霜六月寒  
時見山翁來取雪

東林寺酬韋丹刺史

韋丹帥洪州時靈徹居廬山  
丹與為忘形之契篇什倡和

月居四五丹寄一詩寓  
思歸之意徹答此詩

年老心閒無外事  
麻衣草坐亦容身  
相逢盡道休官好  
林下何曾見一人

東林寺寄包侍御

古殿清陰山木春  
池邊跂石一觀身  
誰能來此焚香坐

共作爐峰二十人

再遊東林寺作五首

釋貫休

臺殿參差聳瑞煙  
桂花飄雪水潺潺  
莫疑遠去無消息

七萬餘年始半年

傳記盡云安遠持奘三車盡生兜率天人間四千年彼天一晝夜亦三十

日為一月十  
二月為一年

桓元舊輦殘雲濕  
耶舍孤墳落照遲

昔桓元入山禮遠公遂捨輦至今在

遠公堂下  
有箇山僧倚松睡  
恐人來取白猿兒

玉像珠龕香陣橫  
錦霞多傍石墻生  
辟蛇行者今何在

花裏唯聞鳩鳥聲

愛陶長官醉兀兀送陸道士行遲遲  
買酒過溪皆破戒  
斯何人斯師如斯

白簷蔔花露滴滴紅  
苾芻草香濛濛  
田地更無塵一點  
是何人合住其中

龍虎山

道士

吳筠

道士身披魚鬣衣  
白日忽上青天飛  
龍虎山頭好明月  
玉殿珠樓空翠微



宋

答顛縣錢顛著作移花

趙抃

令尹憐花意思勤  
海棠多種郡園新  
自從西蜀年年見  
今日欄邊似故人

廉泉

歲旱江潢萬井污  
此泉深靜肯清渝  
伯夸死後泉流在  
能使貪人一飲無

劉仙石

在江州太平興國觀

祖無擇

支機莫問君平肆取履誰修黃石祠深洞自開人不見  
何須惆悵憶當時

將至南康道中

溢江輟棹整驂駢松路揚鞭入翠微好是近郊人候望  
紛紛羽服與田衣

遊栖霞

偷得沈迷簿領身暫來林下訪幽人雲泉滿眼慵歸去  
便擬拋官學隱淪

琵琶亭上作

歐陽修

九江煙水一登臨，風月清含古恨深。  
濕盡青衫司馬淚，琵琶還似雍門琴。

送春寄呈祖袁州

李覲

去年春盡在宜春，醉送東風淚滿巾。  
今日春歸倍惆悵，相逢不是去年人。

因遊華子岡題麻源壁

平生猶未識紅泉，人日纔遊石磴邊。  
宿雨半晴秋草濕。

困來無處可閒眠

琵琶亭

劉敞

江頭明月琵琶亭一曲悲歌萬古情  
欲識當時腸斷處只應江水是遺聲

南浦

王安石

南浦東岡二月時物華撩我有新詩  
含風鴨綠粼粼起弄日鷺黃裊裊垂

烏塘

烏塘渺渺綠平隄隄上行人各有攜試問春風何處好  
辛夸如雪柘岡西

晏望驛釋舟走信州

病起行山山更險下窮溪谷上通天乘高欲作東南望  
青壁松杉滿我前

遊麻姑山六首

曾鞏

行盡壇前石崖路忽見一曲清泠泉酒行到我不辭醉  
安用了了分愚賢

流杯池

古杉蒼蒼橫斗文其幹十圍陰蔽野應到夜深山月來

林色天光迷上下

七星杉

飛泉一支天上來寒影沈沈瀉龍穴山靈欲以恠動人

山路先冬積霜雪

瀑布泉

樹杪蒼崖路屈盤半臺亭榭午猶寒平時舉眼看山處

到此憑欄直下看

半山亭

碑文老勢信可愛碑意小缺誰能鐫已推心膽破姦宄

安用筆墨傳神仙

顏碑

神仙恍惚不可明  
空有池蓮變紅碧  
清香冷落秋風前

似被麻姑妬顏色

碧蓮池

題靈山寺

劉恕

早晚報衙蜂擾擾  
友朋相和鳥闐闐  
餘香滿袖花驚眼  
空翠沾巾雨暝山

醉石

程師孟

萬仞峰前一水傍  
晨光霽色助清涼  
誰知片石多情甚  
曾送淵明入醉鄉

虔州八境圖八首

并序

蘇軾

南康八境圖者太守孔君之所作也君既作石城即其城上樓觀臺榭之所見而作是圖也東望七閩南望五嶺覽郡山之參差俯章貢之奔流雲煙出沒草木蕃麗邑屋相望雞犬之聲相聞觀此圖也可以茫然而思粲然而笑慨然而歎矣蘇子曰此南康之一境也何從而八乎所自觀之者異也且子不見夫日乎其旦如槃其中如珠其夕如破壁此豈三日也哉



苟知夫境之為八也則凡寒暑朝夕雨暘晦明之異  
坐作行立哀樂喜怒之接於吾目而感於吾心者有  
不可勝數者矣豈特八乎如知夫八之出乎一也則  
夫四海之外詼詭譎怪禹貢之所書鄒衍之所談相  
如之所賦雖至千萬未有不一者也後之君子必將  
有感於斯焉乃作詩八章題其上

坐看奔湍遶石樓使君高會百無憂三犀竊鄙秦太守  
八詠聊同沈隱侯

濤頭寂寞打城還  
章貢臺前暮靄寒  
勸客登臨無限思  
孤雲落日是長安

白鵲樓前翠作堆  
縈雲嶺路若為開  
故人應在千山外  
不寄梅花遠信來

朱樓深處日微明  
皂蓋歸時酒半醒  
薄暮漁樵人去盡  
碧溪青嶂遶螺亭

使君那暇日叅禪  
一望叢林一悵然  
成佛莫教靈運後  
著鞭常恐祖生先

却從塵外望塵中無限樓臺煙雨濛  
山水照人迷向背  
只尋孤塔認西東

雲煙縹緲鬱孤臺積翠浮空雨半開  
想見之罘觀海市  
絳宮明滅是蓬萊

回峰亂嶂鬱參差雲外高人世得知  
誰向空山弄明月  
山中木客解吟詩

贈東林總長老

溪聲便是廣長舌山色豈非清淨身  
夜來八萬四千偈

他日如何舉似人

題西林壁

橫看成嶺側成峰，遠近高低各不同。  
不識廬山真面目，只緣身在此山中。

余過溫泉壁上有詩云：直待衆生總無垢，我方清冷混常流。問人云：長老可遵作遵，已退居圓通，亦作一絕。

石龍有口口無根，自在流泉誰吐吞。  
若信衆生本無垢，

此泉何處覓寒溫

世傳徐凝瀑布詩云一條界破青山色至為塵陋  
又偽作樂天詩稱羨此句有賽不得之語樂天雖  
涉淺易然豈至是哉乃戲作一絕

帝遣銀河一派垂古來惟有謫仙詞飛流濺沫知多少  
不與徐凝洗惡詩

書李公擇白石山房

偶尋流水上崔嵬五老蒼顏一笑開若見謫仙煩寄語

匡山頭白蚤歸來

望湖亭

黑雲堆墨未遮山  
白雨跳珠亂入船  
驀地風來忽吹散  
望湖亭下水連天

和毛君州宅八詠

存二

蘇轍

池上茅簷覆水低  
早來秋雨尚紅霓  
敗荷折葦飛鴻下

正憶漁舟泊故溪

方治亭

一夜飛霜點綠苔  
曉庭黃葉埽成堆  
簷間翠樾彫踈盡

却放牆東好月來

翠樾亭

上高息軒起亭二絕

山下清谿谿上市谿光山色映人煙  
幽亭正在人聲裏  
長與谿山共寂然

漁父起收罾下鯉  
山翁起賣焙中茶  
長官亦與人俱起  
笑擁黃紬放早衙

錦繡谷

孔武仲

江城已月芳菲盡  
殘紫深緋到谷中  
最是廬山佳麗處

我來蕭颯已秋風

自歸宗入臨溪觀

紫霄峰下有禪林  
瓦結青瑤地布金  
聞道靈溪纔咫尺  
攜筇不覺後山深

秦人洞

潘興嗣

秦人當日避風煙  
自種桑麻老洞天  
綠竹橫谿雞犬靜  
不知門外漢山川

雩都遊羅田巖

周惇頤



聞有山巖即去尋亦躋雲外入松陰雖然未是洞中境  
且異人間名利心

萍實里

黃庭堅

楚地童謠已兆祥果然所得屬昭王若非精鑿逢尼父  
安得佳名冠此鄉

東林寺

白蓮種出淨無塵千古風流社裏人禪律定知誰束縛  
過溪沽酒見天真

送永倅周茂叔還居瀟溪

任大中

君去何人最淚流  
老翁身獨寄南州  
隨君不及秋來雁  
直到瀟湘水盡頭

屏間偶題

監饒州酒務時作

劉季孫

呢喃燕子語梁間  
底事來驚夢裏閒  
說與傍人渾不解  
杖藜攜酒看芝山

寄題洪州革林胡氏書齋

魏野

江僧昨日到茅齋  
曾向革林駐錫來  
因說故家宗族盛

御書樓對義門臺

望廬山

晁補之

南康南麓江州北五百僧房綴蜜脾盡是廬山佳絕處  
不知何處合題詩

棲賢寺

陳舜俞

辟蛇行者應開寺赤眼高僧尚有墳龍去雨歸三峽水  
鳥銜花出五峰雲

石耳峰

洪芻

朝踏紅塵暮宿雲往來車馬漫紛紛  
侯溪橋下潺湲水  
惟有峰頭石耳聞

曾仲共和予春日登滕王閣詩復次韻

洪炎

西江東畔見江樓江月江風萬斛愁  
試問海潮應念我  
為將雙淚到南州

鉛山縣石井院

兩年再踏鉛山路今日初嘗石井泉  
碧玉巖邊淪湯餅

全勝五鼎擊肥鮮

宿圓通寄佛印

彭汝礪

丈室燈寒夜未眠  
竹間流水聽涓涓  
試看石耳峰頭月  
何似雲居天上圓

西山道中

行盡鍾陵西北山  
籃輿恣意取峰巒  
明朝未必無風雨  
更撥浮雲子細看

臨江驛中庭有大柏因寄潁叔

林麓山頭屋數椽  
中庭翠柏上參天  
廟廊豈不須梁棟  
位置荒幽亦偶然

送曾道者歸玉笥舊隱

劉 翕

踏盡匡廬十載雲  
却抽秋鶴九臯身  
明明似為溪毛熟  
笑整西風不岸巾

題吉水南華寺

紫翠浮浮奪曉昏  
生涯谷汲與松焚  
客塵一點自應少  
終日到門惟白雲

送僧住梅山

韓駒

寺門岑寂知何許，想對千巖萬壑開。  
待得梅山梅子熟，不辭先寄一枝來。

北津渡

謝逸

竹籬茅舍掩柴扉，衰草寒煙野徑迷。  
只有白鷗無俗韻，年年相伴老清溪。

鷺溪

李綱

溪流宛轉若翔鷺，翠色涵虛特地寒。  
底事舞餘窺碧沼。

祇應誤作鏡中看

雩都華嚴院

岳飛

手持竹杖訪黃龍  
舊穴空餘虎子踪  
深鎖白雲無覓處  
半山松竹撼西風

南豐覺源寺

胡寅

靜聞山犬吠雲根  
自掩柴門澗水濱  
四海未清眠不得  
此身猶欲畫麒麟

過豐城

楊時



清江渺渺綠浮天，博物無人繼昔賢。  
應有斗間靈氣在，誰能更與劔龍泉。

宜春溪上

斜斜疎柳照清漪，藉藉殘紅自滿蹊。  
刺眼藤梢牽不斷，欲尋流水路還迷。

過東林 二首

寂寞蓮塘七百秋，溪雲庭月兩悠悠。  
我來欲問林間趣，萬疊松聲自唱酬。

百年陳迹水溶溶尚憶高人寄此中  
晉代衣冠誰復在  
虎溪長有白蓮風

月巖去上饒十里山有側穴腹背皆洞如月

朱松

鑿透巉巖不記春山腰千古挂冰輪  
誰知擘破三峰手  
聊出嬋娟戲路人

題薦福寺莫莫堂

王十朋

休休有室歸宜早莫莫名堂去恨遲  
禪老相逢應笑我

休休莫莫定何時

名郡之東門曰永平書一絕

鄱水新門號永平永平何止一鄱城願言廣此平天下  
黎庶長無愁嘆聲

予自饒易夔以七月九日行饒人遮道挽留易轎  
由間道而去提點何德獻相追不及以詩見寄云  
斷橋截磴亦堪憐始信林間別有天微見兵機第  
一義朱幡暫席廣文壇因次其韻

誤辱鄱陽士庶憐閉門不許出朝天  
門名間行雖乏相如  
壁得句全勝子敬瓊

過五柳灣

出守江湖日念還又扶衰病入巴山不能早作歸田計  
愧過淵明五柳灣

望大孤山

湖口羅家渡中流見大孤山世俗以孤為姑以澎浪  
為彭郎遂有小姑娘彭郎之語蘇坡戲見於詩鄱陽

有童子渡渡頭有小山如冢世傳為九女冢見於圖  
經其事甚怪蓋亦世俗流傳之訛遂以二渡所見戲

成一詩

鄱陽古渡留遺冢湖口煙鬟露淡妝九女何由從童子  
兩姑那肯嫁彭郎

游楞伽 三首

涉水穿雲一徑迂朱砂峰下訪僧居鳥鳴蟬噪更幽處

中有人藏萬卷書

李公擇藏書之所

老僧元不服朱砂境靜心灰壽自遐廬阜招提三百所

只餘折桂與楞伽

有僧年八十一言廬山諸刹惟楞伽折桂不遭焚燬

藏書閣在已無書山色依然滿舊居留得婦人三墨竹

金鐘聲裏尚扶踈

鐘樓有李夫人墨竹公擇女兒山谷母也

游南山入康谷以不觀谷簾泉為恨南康李守致  
上尊乃此泉名也戲成一絕

不飲谷簾山下水徒觀瀑布下長川使君破我游山恨

酒寄人間第一泉

石鏡溪

山中有鏡石為臺雲霧深藏未肯開別有一溪清似鏡  
不須人為拂塵埃

三峽橋

三峽橋邊杖履游此身疑已到夔州題詩欲比真三峽  
深媿詞源不倒流

寄題番禺一江亭

一江明月夜歸遲瀟灑齋中小范詩亭自我名猶未賞

夢游江靜月明時

歸宗樅老言廬山有對云簡寂觀中甜苦笋歸宗  
寺裏淡鹹齏予因以湯泉石鏡戲成一絕

參禪得味鹹齏淡學道忘憂苦笋甜石鏡與時為顯晦  
湯泉涉世有涼炎

楞伽院

張孝祥

天圍欲盡三千界地險何殊百二關獨到中峰最高處  
諸君元不識廬山



寶氣亭

胡銓

塵容不逐江流淨  
酒力都從雪壓消  
斗下只今無劍氣  
年來牛犢在人腰

薦福寺

并序

王阮

乾道初予領鄱陽貢事實棘薦福寺以試堂下巖桂  
盛開為護持之淳熙八年再至為賦一首

十七年間一夢迷  
重來渾不辨東西  
院中誰識前時客  
莫莫堂前老木樨

黃公灘一首

并序

贛石三百里中有大小黃公灘與萬安縣對無甚險  
惡坡公誤聽以為惶恐遂對喜歡慶元二年十一月  
十四夜余宿灘下夢人絳衣素冠辨論叟叟略記其  
旨似謂不願人畏余應曰灘指石爾水何與焉其人  
有喜色意者黃公耶

水泝安流舟不難人心自畏石頭頑黃公誤聽作惶恐  
玉局先生蓋謂灘

尋真觀 并序

唐蔡真人乘鸞處蓋五老峰側九疊屏下也記云詠  
真洞天在龍潭底

鸞昇天上五峰青龍住山中九疊屏知有洞門藏水底  
倚欄我欲眺清冷

延真觀 并序

唐女道士李騰空葬科簡乘鸞處也騰空李林甫女  
故太白詩羨君相門女學道愛神仙

偃月堂成竟斲棺  
延真人只葬衣冠  
浮雲眼見成騎虎  
不似抽身穩跨鸞

同張安國遊萬杉寺

昭陵龍去奎文在  
萬歲靈杉守百神  
四十二年真雨露  
山川草木至今春

湘東驛至萍鄉

阮閱

萍鄉路與醴陵通  
溪上長亭草木中  
行盡江南有山處  
門前隔水是湘東

萬載縣

門橫路斷竹為籬  
雪色漫漫瓦屋稀  
黃嶺青腰虛市罷  
盡沽紅酒夕陽歸

至上高

上蔡人歸古縣封  
蜀江依舊水流東  
末山雲散庵猶在  
敖嶺丹成井已空

次韻擇之鉛山道中

朱子

行盡江湘萬疊山  
家山猶在有無間  
明朝漸喜登闕嶺

澗水分流響珮環

次韻擇之金步喜見大江有作

江頭四望遠峰稠  
江水中間自在流  
並岸東行三百里  
水源窮處即吾州

晚飲列岫

危亭披豁對蒼霞  
策杖重來日未斜  
滿目江山一尊酒  
哦詩莫遣大雄誇

次伯崇登滕王閣感舊蓋聞往時延閣公拜疏於

此云

金闕銀臺夢想中樓前拜舞卓囊空十年殄瘁無窮恨  
歎息今人少古風

石井

一竇陰風萬斛泉新秋曾此弄清漣人言湛碧深無底  
只恐潛通小有天

次沈侍郎游楞伽李氏山房韻

二首

喜陪後騎陟崔嵬竹裏泉鳴古寺開吟罷蘇仙頭白句

天風更送好詩來

天聰已許一言悟  
年少懸知萬卷開  
珍重當時讀書處  
低徊空有後人來

赤岡頭望遠山作

曉起清江弄小舟  
晚風吹過赤岡頭  
遠峰自作修眉斂  
萬里那知客子愁

次韻擇之發臨江

千里煙波一葉舟  
三年已是兩經由  
今宵又過豐城縣



依舊長江直北流

竹節灘

船下清江竹節灘  
長煙漠漠水漫漫  
人家斷岸斜陽好  
客子中流薄暮寒

登閣阜山

二首

疊疊層巒鎖闕宮  
我來舊地訪靈踪  
葛仙去後無丹竈  
弟子今成白髮翁

一派泠泠臺下水  
半空漠漠嶺頭雲  
祖師成道冲天去

只有無窮受錄人

讀李賓老玉澗詩偶成

獨抱瑤琴過玉溪  
琅然清夜月明時  
祇今已是無心久  
却怕山前荷蕢知

題萬安野館

身似孤雲去復還  
投裝猶記此窗間  
只因煙火蒼茫外  
即是當時萬疊山

二十七日過毛山鋪壁間題詩者皆言有毛女洞

在山絕頂問之驛吏云狐魅所為耳因作此詩

人言毛女住青冥散髮吹簫夜夜聲却是郵童解端的  
向儂說是野狐精

之德化宿劇頭鋪夜聞杜宇

王事賢勞祇自嗤一官今是五年期如何獨宿荒山夜  
更擁寒衾聽子規

吉州凌波亭月夜

王庭珪

螺浦東邊雪浪生峰頭月出半輪明扁舟欲載銀蟾去

一聽蒼龍水底鳴

定叟弟頻寄黃檗仰山新茅口占小詩

張栻

集雲峰頂風霜飽黃檗洲前水石清不入貢苞供玉食  
祇應山澤擅高名

仙居洞

錢聞詩

仙客神人幾度行環山岌葉似重城有門不掩寒溪月  
終日水流無盡聲

跋臨川梁譯居士孝德記

楊萬里

雪裏星奔避亂兵  
母先子後赴寒冰  
祇知判得身俱死  
不料生還母再生

自金陵西歸至豫章發南浦亭宿黃家渡

過了重湖雪浪堆  
章江欲盡淦江來  
回到家無此江山景  
畫舫行遲不用催

過玉山東三塘

二首

筍輿拾得小涼天  
旋與開窻急捲簾  
十里輕雲掩秋日

日光移在遠峰尖

綠車香裏過征衫  
白繭黃絲兩兩三  
不是秋風上饒路

一生不信有冰蠶

將赴高安出吉水  
報謁縣官歸塗宿  
五峯寺

野寺重來寄昨遊  
一彈指頃幾經秋  
五峰絕頂雙松樹  
相識兒時到白頭

初入筠州界高岡鋪

千尺霜松夾道周  
國初涼繖至今留  
筠州舊是朝天路

六十年來行信州

宿阜口驛

倦投破驛歇征驂  
喜見山光正蔚藍  
不奈東風無檢束  
亂吹花片點春衫

二月一日曉渡太和江

綠楊接葉杏交花  
嫩水新生尚露沙  
過了春江偶回首  
隔江一岸好人家

餘干沂流至安仁

半篙新漲滿帆風兩岸千山一抹中  
慙媿擢郎能袖手  
若非袖手更無功

宿小沙溪 二首

樹補山煙煙補雲風搖花雨作香塵  
綠楊儘道無情思  
何苦垂條拂路人

諸峯知我厭泥行捲盡癡雲放嫩晴  
不分竹梢含宿雨  
時將殘點滴寒聲

將至建昌



梅雨片泥路不佳悶來小歇野人家綠萍池沼垂楊裏  
初見芙蕖第一花

過虎溪對東林蒼巖翠樾下侵大澗宛似靈隱冷  
泉囑長老法才作亭名曰過溪且為率山丁薙草  
定基一朝而畢

范成大

過溪無限翠屏間大笑從教虎子猜不獨山中添故事  
仍教題作小飛來

清音堂與趙德莊太常小飲在餘干琵琶洲旁洲

以形似得名

曲浦灣環繞縣清一杯閒客雨飄零琵琶不語蒼煙暮  
山水清音著意聽

玉虛觀去宜春二十五里許君上升時飛白茅數  
葉以賜王長史王以宅為觀觀旁至今有仙茅極  
異常草備五味尤辛辣云久食可仙道士煮湯以  
款客

白雲堆裏白茅飛香味芳辛勝五芝揉葉煮泉摩腹去

全勝石髓畏風吹

乾道初予自臨川歸鍾陵李德遠范周士送別于

西津是日宿戰平風雨終夕今自臨川之高安復

以雨中宿戰平悵然感懷二首  
陸游

故人已作山頭土倦客猶鄣陌上塵十五年間真一夢  
又騎羸馬涉西津

十五年前宿戰平長亭風雨夜連明無端老作天涯客  
還聽當時夜雨聲

玉壺亭

玉壺亭上小徘徊  
閔對殘荷把一杯  
冠蓋交馳期會急  
長官未必辦頻來

紫谿驛

雲外丹青萬仞梯  
木陰合處子規啼  
嘉陵棧道吾能說  
略似黃亭到此溪

經龍泉武陵瀧

周必大

芙蓉池水接清溪  
晴日初乾雪後泥  
行過小橋驚野鴨

翩翩飛上綠楊西

秋日登擬岷臺

謝 邁

步上溪邊百尺臺  
斬新秋色正傷懷  
千屏翳繞碧雲合  
一字傾欹鴻雁來

欲遊閣阜山

劉 過

仙梯難上塵緣重  
俗駕勒回山有靈  
煙靄模糊雨昏黑  
數峯疑在夢中青

弋陽渡頭

車聲盡日滑黃泥怕聽空桑叫竹雞風雨不知春早晚  
柳條搖綠半江垂

拾椽亭為黃炳賦

嚴 粲

世上危機富貴身由來著意鬼神嗔到頭鐘鼎誰消得  
正要山中拾椽人

被檄樂平至鳴溪渡有山與南豐軍山同名者余  
昔從嶺庵謝先生夢得遊先生于湖畏友也豪於  
詩悅軍山之峭拔暢其吟懷自昭武徙家於市山

築室曰西窗以朝夕對焉嘗命余記之余時從西窗尊酒論文為樂如是者十載今先生已矣感而

賦詩

江西絕頂插晴空此地山名偶自同喚起西窗十年夢  
一樽何處酌詩翁

豫章溝

劉克莊

溝水泠泠草樹香獨穿支徑入垂楊薺花滿地無人見  
惟有山蜂度短牆

西山

絕頂遙知有隱君  
冷芝種木鹿為羣  
多應午竈茶煙起  
山下看來是白雲

江西道中

丁男放犢草間嬉  
少婦看蠶不畫眉  
歲暮家家禾絹熟  
萍鄉風物似豳詩

敷淺原見桃花

桃花雨過碎紅飛  
半逐溪流半染泥  
何處新來雙燕子



一時銜在杏園西

僕所居蓋濂溪先生之故基也有井清甘而寒先生嘗以比谷簾今為路人所汲余作亭號濂溪泉而為之銘

周紫芝

山下清泉古甃寒百年誰為發幽潛可憐昔日供茶鼎曾與先生當谷簾

琵琶亭

舊事無人作短行湓江空自繞湓城黃蘆苦竹依然在

猶替琵琶作怨聲

鄱陽郡圃偶題

林希逸

曲階倚杖行踈影  
柳花度竹黏衣領  
臺根三兩落殘梅  
時見幽禽窺野井

撫州偶題

樂雷發

金柅亭邊柳拂城  
春風繫馬酒家吟  
塵埃滿面無人識  
却得黃鸝作賞音

新塗偶成

飛飛綠鳳挂梅梢猶記來時雪擁袍今日歸舟新淦路  
擔頭稚子賣櫻桃

松風閣

裘萬頃

白雲殊不作俗態流水更似知人心溪邊濯足溪上坐  
樵唱一聲秋滿林

予既得烏石岡西望葛壇在雲霄中相去雖遠山  
勢不斷林木歷歷可數異時乞靈仙翁不難矣喜  
而成詩寄葛壇主人

東西知隔幾牛鳴山勢綿綿若引繩待向岡邊結茅屋  
幅巾遙禮夜壇燈

之官過贛灘

二首

徐鹿卿

玉局詩中惶恐灘聞之已為骨毛寒那知舞索并天柱  
更向前頭作怒瀾

灘聲嘈雜怒車轉雷頑石參差撥不開行客盡言灘路嶮  
誰教君向嶮中來

曾氏清江亭

想得當年月浸扁諸公翰墨此縱橫亭荒久矣詩亡恙  
一道長江萬古清

七月二十一日重過贛灘

五首

矯矯雄張虎欲奔低低蹲伏鴈成羣  
丁寧莫礙行舟過  
喚作長生萬石君

北來快順一篙駛南去間關百丈牽  
世事從來且如許  
下灘船看上灘船

嶺海脂膏自古傳至今來往共長川  
川靈有眼還知道

幾個歸人月滿船

聞道春江激滯時灘平如掌棹如飛何時滿却葵丘戍  
流水桃花送客歸

十八灘頭一葉身山川曾識舊詞臣詩魂百載猶蘇醒  
應笑風波解戲人

龍虎山

江萬里

鑿開風月長生地占却煙霞不老身虛靜當年仙去後  
不知丹訣付何人

贛州上清道院呈姚雪蓬

鄧林

短牆不碍遠山青無事燒香讀道經時把一杯非好飲  
客懷宜醉不宜醒

綠陰亭自唐時有之到今五百年盧肇二三公題  
詩之後吟聲寂寂久矣亭前古木不存綠陰之名  
殆成虛設今詩人李賈友山作尉於此實居此亭  
公事之暇與江山風景相應接境因人勝見於吟  
筆多矣友人石屏戴復古訪之相與周旋於亭上

題二絕句以記曾來

慘慘秋風吹客襟  
唐人遺跡宋人吟  
浮雲世事多遭變  
不獨此亭無綠陰

千山橫碧一溪清  
白鳥飛邊落照明  
吏散庭階一無事  
綠陰亭上又詩成

馬祖巖

文天祥

會將飛錫破苔痕  
一片雲根鎖洞門  
山外人家山下路  
石頭心事付無言



禪關

秋風吹日上禪關路入松花第一灣只願四時煙霧少  
滿城樓閣見青山

塵外亭

半山風雨截江城未脫人間總是塵中夜起看衣上月  
青天如水露華新

西昌倪氏有山谷書杜陵山水圖障歌作江山堂  
堂廢其後人以黃書求題跋感慨一絕

杜二已亡黃九去長歌大字落江山百年風物今何似  
春水晚煙飛白鷗

九宮山

謝枋得

真人何代結幽栖累世奎光煥紫泥日月高奔黃道近  
衡廬傍出玉繩低

壯節亭二松

趙宗錦

壯節亭前野碧滋髯龍飛去忽經時祇應黃犢蒼藤路  
尚有清泉白石知

了頭巖

煙雨斑斕石蘚春墜雲誰夢寶花顰行人總被虛名誤  
到得傾城又誤人

張天師飛昇圖

鄭思肖

玉局曾經拜老君子孫今尚寶元文要知龍虎山前意  
但看空中數片雲

陶淵明三徑圖

老氣蒼寒松樹活閒情幽淡菊花開一條古路無人走

還且與誰相往來

豫章臺

況志寧

城陰冷落豫章臺  
平地晴沙捲雪來  
欲訪隣翁問陳跡  
小園荒徑長莓苔

谷簾泉

二首

葛長庚

紫巖素瀑展長霓  
草木幽深霧雨淒  
竹裏一蟬聞竹外  
溪東雙鷺過溪西

步入青紅紫翠間  
仙翁朝斗有遺壇  
竹梢露重畫猶濕

松裏雲深夏亦寒

滕王閣

釋

晦機

檻外長江去不迴  
檻前楊柳後人栽  
當時惟有西山在  
曾見滕王歌舞來

羅霄洞

釋

德最

江南二月春無邊  
谿竹十里花爭妍  
兒童且莫吹羌管  
我欲臨流枕石眠

元

過湖口望廬山

方回

江行初見雪中梅  
梅雨霏微棹始迴  
莫道無人肯相送  
廬山猶自過湖來

新淦藍步溪

何中

陰靄通煙翠  
作霏春風入  
雨暖成泥  
女郎挑菜不知濕  
調笑相攜過水西

豫章登舟作

城南無樹識神仙  
閒往閒來四十年  
西岸青山東岸塔

為誰相對老秋煙

象牙潭

水禽兩兩樹三三  
近浦遙峰隔嫩嵐  
新換一天秋色別  
短篷又過象牙潭

歸鶴亭

趙孟頫

仙去人間有古亭  
四山林木鬱青青  
步虛聲轉松風響  
思掬巖泉洗耳聽

女兒浦歌

二首

揭傒斯

女兒浦前湖水流  
女兒浦口過湖洲  
湖中日日多風浪  
湖邊人人還白頭

大孤山前女兒灣  
大孤山下浪如山  
山前日日風和雨  
山下輕舟自往還

洪州歌

十二首存六

柳貫

豫章城西江上舟  
船翁夾舵起紅樓  
官鹽法茗有饒乏  
市利商功無算籌

厭原山上雲封頂  
谷鹿洲前水作文  
老向江城收物色



洪崖仙子舊知聞

東湖水滿葑雲開掠取煙光雨色來未放官繇興畚插  
且從魚樂占池臺

秋屏閣上看西山每到須拚薄暮還豈有珠璣資簸弄  
祇教塵土羨蕭閒

諸使官名小字題石幢今在驛垣西當時得托大手筆  
岐陽十鼓與之齊

舊聞雙井團茶美近愛麻姑乳酒香不到洪都領佳絕

吟詩真負九迴腸

桑落洲

范攄

桑落洲前秋興孤  
白雲遠見近還無  
傳聞酒吏經年罷  
美釀家家得縱沽

東巖寺

虞集

雲林流水到巖前  
山色溪聲意宛然  
昨夜一竿修竹外  
東西無影月孤圓

小孤山

二首

傅若金

船度江天暮色青  
半江峰影動寒星  
海風忽起玄珠樹  
山月遙生綠玉屏

海上夜失蓬萊山  
九江飛翠落雲間  
仙人暮暮來絕頂  
徑踏星辰朝九關

過豐城 二首

石泉濺濺照晴暉  
山崦茸茸帶夕霏  
憶得年時松下路  
兒童相逐采樵歸

隔溪篔簹竹似吾  
廬竹裏人家夜  
讀書一去故園如  
昨日

春來頻夢帶經鋤

過東林寺

李洞

風破西村雨氣昏  
泠泠澗水竹間聞  
山頭知有靈仙過  
千丈通明五色雲

江西滕王閣圖

吳師道

西山湧翠大江流  
歷歷開圖記昔遊  
寂寞滕王舊時閣  
秋風斜日下城頭

過信州

高克恭

二千里地佳山水無數海棠官道旁風送落紅攬馬過  
春風更比路人忙

過弋陽

雷聲驅雨過山西山腹雲根似削齊日暮牧童歸不得  
料應白水漲前溪

白石庵

周權

地幽山氣靄空嵐落葉蕭蕭白石庵歸鶴一聲無覓處  
松梢擎月影參參

草坪驛和薩天錫

盧琦

林外輕風帽影斜  
客衣近染紫山霞  
等閒檢點春多少  
牆角薔薇幾樹花

為彭道士賦鶴峰

在信州城南

陳旅

跨鶴臺高倚翠微  
昔人城郭是耶非  
蕊珠宮觀秋如水  
有客吹笙月下歸

鍾令公讀書巖

滕賓

巉巖石室歛江東  
昔隱唐官越國公  
勝迹不磨遺像在

書聲時落半天風

銅鑲鯉

洞宮曾此扣銅鑲遺却金鱗碧水間  
一夜風雷天外動化龍飛去不知還

月巖

劉清叟

世事從來滿則虧十分何似八分時  
青山作計常千古只露巖前月半規


過清遠驛

危素

雲滿故鄉芳草迷江東江西人別離征船今日洪都去  
清遠驛前聽子規

思賢亭

學士前身衡嶽君景星華月鳳皇羣門生只有山人在  
獨構亭高想暮雲





江西通志卷一百五十七